



Kuvendi i Komunës Klinë

Komiteti për Politikë dhe Financa

01Nr 06-2466 /25

Klinë, dt: 23, 01 /25

PROCESVERBAL

Nga mbledhja e dymbëdhjetë e rregullt e Komitetit për Politikë dhe Financa, mbajtur, më 05.12.2024, me fillim nga ora 09:00, në sallën e Kuvendit të Komunës.

Mbledhjen e hapi Kryesuesi, z. Fadil Gashi, i cili përshëndeti të gjithë anëtarët e Komitetit, nënkryetaren e komunës, znj. Marqe Selmanaj, drejtorin e Financave, z. Enver Berisha, zyrtarin për Prokurim, Labinot Morina, OSBE-në, policinë e Kosovës dhe gjithë të pranishmit. Komiteti për Politikë dhe Financa, përveç pikave të parapara në rend të ditës, shqyrtoi dhe rekomandoi për shqyrtim dhe miratim në Kuvend këto pika:

- Shqyrtimi i Planit të Punës së ekzekutivit të Komunës së Klinës për vitin 2025
- Shqyrtimi i Planifikimit të Prokurimit për vitin 2025

Më pas, kryesuesi, prezantoi rendin e ditës:

1. Arsyetimi i mungesave;
2. Shqyrtimi dhe miratimi i procesverbalit nga mbledhja e mbajtur më datë 08.11.2024;
3. Shqyrtimi i Planit të Punës së Kuvendit dhe Kalendarit për mbajtjen e mbledhjeve për vitin 2025;
4. Shqyrtimi i Planit të Punës së KKSB-së për vitin 2025;
5. Shqyrtimi i kërkesave të arritura për Komitetin për Politikë dhe Financa për muajt nëntor-dhjetor 2024;
6. Të ndryshme.

Fadil Gashi, kryesues: Mirëmëngjesi, mirë se keni ardhur në takimin e rregullt të Komitetit për Politikë dhe Financa!

Po besoj që përveç shtesës dhe materialit që e keni marrë, kam edhe dy kërkesa për t'i futur në rend të ditës. Në takim mund të fillojmë sepse jemi gjashtë nga shtatë anëtarët, ndërsa Tuna veç është duke ardhur dhe ka konfirmuar se vonohet pak, prandaj mund të procedojmë.

Kam dy kërkesa: e para është planifikimi i prokurimit për vitin 2025 dhe e dyta është plani i punës së ekzekutivit për vitin 2025. A ka dikush për rend të ditës?

Me 6 vota PËR u miratua rendi i ditës.

Pika 1. Arsyetimi i mungesave.

Fadil Gashi, kryesues: Jemi gjashtë anëtarë, Tuna veç është duke ardhur dhe ka konfirmuar se vonohet pak.

2. Shqyrtimi dhe miratimi i procesverbalit nga mbledhja e mbajtur më datë 08.11.2024.

Fadil Gashi, kryesues: A ka dikush për procesverbal?

Me 6 vota PËR, u miratua procesverbali nga mbledhja e kaluar.

Pika 3. Shqyrtimi i Planit të Punës së Kuvendit dhe Kalendarit për mbajtjen e mbledhjeve për vitin 2025.

Fadil Gashi, kryesues: Ju i keni pranuar të dyja, edhe planin edhe kalendarin. I keni edhe datat e takimeve, edhe seancave të rregullta dhe solemne. Po ashtu, duhet të planifikohet nëse ka raste emergjente ose ndonjë seancë të jashtëzakonshme. Mbetet që pjesën tjetër të kalendarit ta plotësojnë edhe komitetet tjera; ata mund ta bëjnë këtë edhe pas miratimit në kuvend. Unë po hap debat, a ka dikush për kalendarin dhe planin e punës?

Komiteti për Politikë dhe Financa, pas shqyrtimit të Planit të Punës së Kuvendit dhe Kalendarit për mbajtjen e mbledhjeve për vitin 2025, me 6 vota PËR, rekomandoi që të kalojë për shqyrtim dhe miratim në kuvend.

Pika 4. Shqyrtimi i Planit të Punës së KKSB-së për vitin 2025.

Lidhur me këtë pikë të rendit të ditës, referoi nënkryetarja e komunës, **znj. Marqe Selmanaj**. Ajo theksoi se në Planin Vjetor të Punës së KKSB-së përcaktohen objektivat dhe aktivitetet të cilat do të ushtrohen nga anëtarët e KKSB-së në përmbushje të qëllimit të funksionimit të këtij mekanizmi. Ky plan synon të identifikojë qëllimet, aktivitetet dhe rezultatet, përkatësisht caktimin e përgjegjësive për kryerjen e detyrave të përcaktuara me Udhëzimin Administrativ për KKSB-në.

Roli i KKSB-së në komunën tonë ka rëndësi të veçantë sepse identifikon dhe mbledh shqetësimet e qytetarëve nëpërmjet përfaqësuesve të bashkësive etnike, fetare, sociale dhe profesionale. Këto shqetësime shqyrtohen bashkë me përfaqësuesit institucionalë të komunës dhe të organeve të sigurisë, dhe tentohet të zgjidhen në dobi të qytetarëve. Po ashtu, ajo kërkoi që i njëjti plan të kalojë për shqyrtim dhe miratim në Kuvend.

Komiteti për Politikë dhe Financa, pas shqyrtimit të Planit të Punës së KKSB-së për vitin 2025, me 6 vota PËR, rekomandoi që i njëjti të kalojë për shqyrtim dhe miratim në Kuvend.

Pika 7 . Shqyrtimi i Planifikimit të Prokurimit për vitin 2025.

Lidhur me këtë pikë të rendit të ditës, referoi zyrtari nga zyra e Prokurimit, **z.Labinot Morina**. Theksoi se numri i procedurave gjithsej sipas planifikimit të prokurimit parashihet të jetë 72: furnizime 25; shërbime 11; punë 36. Ndërsa vlera totale në euro është 6,859,584.00 euro. Po ashtu, kërkoi që i njëjti të kalojë për shqyrtim dhe miratim në Kuvend.

Fadil Gashi, kryesues: A ka dikush tjetër? Po, Tunë Deda?

Tunë Deda: Përshëndetje për të gjithë! Po, shumë mirë që e ke bërë këtë plan të punës, por edhe një kërkesë e kam për ju, zyra e prokurimit: me i shpall me kohë tenderët e jo me na zënë dimri duke punuar. Kjo është kërkesa ime, për shembull, sot janë duke punuar këto kockat në rrugë edhe ka pasur ditë që ka pasur ngrica natën dhe aty punohet kot tash, kaq.

Fadil Gashi, kryesues: Faleminderit, Tunë! Po, urdhëro, Labi?

Labinot Morina, zyrtar i Prokurimit: Përshëndetje, Tunë! Kontrata është e lidhur diku në

qershor, më së voni është qershori se në qershor është lidhur kontrata, që është e përfshirë kontrata e sheshit me trotuarin deri te udhëkryqi Klinë-Pejë, por punët vazhdojnë. Kontrata është dyvjeçare, kështu që, varet prej menaxhimit të kontratës, nuk është faji te ne. Procedurat janë zhvilluar shumë herët, jemi një nga aktivitetet kontraktuese që nisim procedurat më së herëti.

Tunë Deda: Në rregull, në këtë moment nuk është faji te ju, por është faji te dikush që e lë me punuar në këtë kohë kur janë ngricat, se ai beton është dhe nuk qëndron.

Fadil Gashi, kryesues: A ka dikush tjetër?

Komiteti për Politikë dhe Financa, pas shqyrtimit të Planifikimit të Prokurimit për vitin 2025, pa ndonjë vërejtje apo sugjerim, me 7 vota PËR, rekomandoi që i njëjti të kalojë për shqyrtim dhe miratim në Kuvend.

Pika 8. Shqyrtimi i Planit të Punës së ekzekutivit të Komunës së Klinës për vitin 2025.

Kryesuesi theksoi se, sipas hyrjes së këtij dokumenti, Plani i Punës së ekzekutivit të Komunës së Klinës për vitin 2025 është hartuar duke bazuar në kërkesat që kanë qytetarët e komunës, të shprehura gjatë dëgjimeve buxhetore dhe në formë të shkruar që bëjnë në komunë. Po ashtu, ky plan i punës është përgatitur duke pasur për bazë disa nga qëllimet e synimet si qeverisje lokale, ligjshmëria, rritja e vazhdueshme e transparencës dhe llogaridhënies para qytetarëve. Ne kemi obligim ligjor shqyrtimin dhe miratimin e tij në Kuvend.

Komiteti për Politikë dhe Financa, pas shqyrtimit të Planit të Punës së ekzekutivit të Komunës së Klinës për vitin 2025, pa ndonjë vërejtje apo sugjerim, me 7 vota PËR, rekomandoi që i njëjti të kalojë për shqyrtim dhe miratim në Kuvend.

Pika 7. Shqyrtimi i kërkesave të arritura për Komitetin për Politikë dhe Financa për muajt nëntor-dhjetor 2024

Kërkesa 1.

Kërkesë e parashtruar nga "Benita Fruits" shpk NUI. 811242940 me seli në fshatin Gremnik, Komuna Klinë, kërkon nga KK Klinë që t'i jepet në shfrytëzim parcela me nr. 00547-0 Zona Kadastrale Dollc, pronë e Komunës së Klinës. Arsyeja e kërkesës për shfrytëzimin e parcelës është zhvillimi i fermës për rritjen e pulave të fshatit.

Fadil Gashi, kryesues: Dhënia në shfrytëzim e hapësirave publike ka një procedurë bukur të mundimshme në respektim të procedurave dhe komuna ka obligim sipas ligjit me shpallur listën e pronave që do të japë në shfrytëzim, që në start është e pamundshme. A ka dikush për këtë kërkesë?

Komiteti për Politikë dhe Financa, pas shqyrtimit të kërkesës së parashtruar nga “Benita Fruits” shpk, me 7 vota PËR, rekomandoi që kërkesa të dërgohet për shqyrtim

Kërkesa 2.

Kërkesë e parashtruar nga z. Zair Salihaj nga fshati Zabergjë, Komuna e Klinës, i cili thekson se: Jam vëlla i dy dëshmorëve, Refki dhe Rizah Salihaj, të rënë në luftën e UÇK-së. Kërkoj nga Kuvendi i Komunës që të shikojë mundësinë për emërtimin e sheshit në fshatin Zabergjë me emrat e dy dëshmorëve “Refki dhe Rizah Salihaj.” Po ashtu, ne kemi marrë edhe pëlqimin e banorëve të fshatit për emërtimin e këtij sheshi në fshat. Prona e cila do të emërtohet ky shesh është pronë shoqërore e komunës së Klinës me nr. 00184-0 ZK Zabergjë.

Komiteti për Politikë dhe Financa, pas shqyrtimit të kërkesës së parashtruar nga z.Zair Salihaj për emërtimin e sheshit në fshatin Zabergjë me emrin e dy dëshmorëve “Refki dhe Rizah Salihaj”, me 7 vota PËR, rekomandoi që kërkesa të dërgohet për shqyrtim në Kuvend.

Pika 8. Të ndryshme.

Fadil Gashi, kryesues: Në të ndryshme, a ka dikush?
Atëherë po e përfundoj mbledhjen, duke ju falënderuar për pjesëmarrje dhe angazhim.

**Procesmbajtësja,
Monika Palushi**



**KRYESUESI,
Fadil Gashi**

